

Öise Lade 11-2009, p. 54

Tge sa zuppa en quest cornet? E tge buntads èn pachetadas en l'auter cornet?

Cornets u «stortins» – co che nus schain – cun schambun e vitiers ina salata èn in stupent menu da stad u in accompagnament ideal



## Zuppà en pasta

per in aperitiv. Jau enconusch els il meglier cun in'emplenida da schambun cotg, forsa in pau mustarda e tschagugliuns... Na, sche jau ponderesch in pau, alura na constat quai gnanc. Anc meglier enconusch jau numnadamain ils cornets cun emplenida da nitscholas, mandels u tschigulatta. Quels hai jau propi gugent! – I na dependa betg, sch'ils cornets èn fatgs cun pasta da sfegliada, pasta da turta u in'otra pasta. Il pli impurtant è per mai ch'els cuntegnian ina bella purziun d'ina buna emplenida. En consequenza han mes «stortins» alura bleras giadas ina curiusa furma e sumeglian plitost in pachet ch'in cornet. Uss hai jau dentant cumprà dacurt ina schablona che taglia la pasta en tocs regulars e che dat la furma e la dosa ideala per l'emplenida. Mes cornets d'emprova èn gartegiads stupent! Els eran propi bels ed avevan ina furma da bellezza. Ma per mai eran els in pau sitgs, perquai che jau avess sco ditg gi gugent dapli cuntegn che pasta... Uss hai jau in utensil dapli en stgaffa-cuschina e mintga giada cura che jau less far cornets, stun jau avant la dumonda cardinala: less jau far bels cornets per ils eglis u plitost buns, malfurmads?

Tgi sa, forsa chat jau anc or il tric, tgenin ch'è la meglra via tranteren e lura gartegian forsa schizunt bels cornets per ils eglis cun avunda emplenida. Lain guardar...

Jau As giavisch bun success cun il pachetadi...



Karin Kohler-Pattis